

普
陀
山
志

重修南海普陀山志卷之十六

粵東歸善黃應熊飛涓叅定

古閩同安許琰瑤洲編輯

法雨住持釋明智法澤校訂

釋氏藝文

二大士傳

明

釋真一

補陀潮音洞有二大士者一現男子身一現婦人身
面目黧黑頭髮鬢亂萬歷三十三年婦人以六月至
山男子禮九華以十月至山居于洞南之山頂石上
各以茅苫一蓬高不過三尺上漏下濕匡坐其中惟

飲水茹蔬而已人與之米不辭與之錢亦不辭有游
衲至竟散與之或數日絕粒不以爲病山中人以爲
丐者莫之知也余偕居士陳載卿夜至其所默與之
坐不通問訊彼亦不驚顧舉燈視之惺然無昏睡狀
余始與之談男子但笑而不言婦人則隨叩隨荅不
作道理會而吐辭等刀鋸莫可犯其鋒問其姓名則
曰有甚姓名問其年紀則曰有甚年紀問其何許人
則曰有何方所問其曾住何山則曰住終南爲久問
其見何道理但曰眼見大海耳聞風聲雨聲潮聲鳥
聲問其作何工夫則曰有時想起觀世音便念幾聲

餘則唯坐坐中亦無甚做工夫處其言詞直捷如此
似胸中無一物者余大駭之春二月人皆來謁洞男
女堵觀之曰汝輩各安穩去問我何爲遂不見

普陀勅建法雨禪寺中興記

以下釋至善國朝

圓通大士之聲光普應如躋月在空江海瀋潦濃纖
鉅細無不在焉普陀之山歷代高人勝士棲遲者未
可指數明萬歷間大智禪師由我膺瑩華結茅于斯
久之道聲流溢乃聞于朝降帑頒經中官監造復賜
額鎮海何其煒歟繼遭劫火臺殿荆蕪實可慨已

今上卽位之二十有三年海宇蕩平版圖式廓別公禪

師杖笠西來會陳公總提浙師素耳公名乃同鎮府
黃公給諫屠公肅書敦幣迎公主之明年公來自太
白登殿拜起周顧太息曰最上覺場千楹萬指粹致
是哉未幾而龍象蜩集雲衲川赴忘軀爲法者趨奔
恐後乃先結茅殿草寮爲安衆所一時宇內緇白咸
慶名山得人 和碩裕親王聞之施戒衣數百請說
三壇大戒已巳春 龍駕南狩秩望山川命侍臣賫
帑勅建殿宇復有天下臣民共種福田之旨于是四
方善信梯山航海投金置粢求法問道者比比而舊
住長老明公知藏霜栢佛乘諸子遂往福州分衛時

鼓山爲霖和尚年已八十聞公名欣爲倡道致書本省當事如都統祖公撫軍卞公共施巨木數千章大將軍施公發海艚運載而鎮府藍公協舟相濟首建圓通大殿自餘諸處漸次落成昔大智禪師之開此山也臨滅度時記云吾去百年復來與此今當茲殿升梁之日恰滿百歲與記合符人皆以公爲智祖後身已卯春 翠華重幸公率衆迎鑿謝恩遂蒙詔對溫旨優渥疊賜

御書帑金及今額又給江南黃瓦葺殿遇合之隆千載一時也公嘗以殿務肇興率諸執事扣平大徹素白

在璿等往金陵分衛諸當事聞之請于江寧大報恩寺說法宗風大振聽者億計自先明密雲禪師陞座後未有埒于公者法雨規模宏暢形勢低昂凡諸建造視山高下而廣狹因之宏製巧構甲于東南公以壯年來主茲山未滿十稔百廢具興是稱克家而說法充實舉措合宜外則建立名藍內則宏宣祖秘又出其餘力脩宋元以來未續之燈重建徑山普覺塔院奉高峯老人神主入天寧祖堂諸如此等可謂法苑之功臣矣嗣法小師燕京無際信州玉峯括蒼映文東甌斗南其最著者至于翼養劬脩槌拂之下林

林總總未可殫紀光被前人範模後進自非乘大願
輪津梁未運疇能之哉余與公爲法門先後幸預宗
屬碌碌于世三十餘年視公所爲形將汗矣嗚呼大
智唱滅百有餘年當法門凋落之際而能脩敝起廢
移梵釋龍天之宮置于人間謂非中興不可記且未
盡係之以銘銘曰洛伽之山杳絕塵寰下臨碧海
上摩青天東華四勝茲蓋首元是故大士降跡于先昆
瑟胝羅曾有是言海上有山多諸聖賢故命童子求
道于前詎曰無稽證之簡編屢朝帝王宮降檀煙匪
我大聖行滿功圓烝嘗蔚起難乎其全維嘉隆秋地

冷峯薦禪師大智杖起岷源錫留茲土漸漸改觀九
重聖母遠煥林泉朱提碧瓦用寶爲巖哲人旣萎依
舊草芊百有餘祀寒盡當暄仰惟

今上文武瘠淵遠人臣服海靖波恬歲在甲子天運循
環洛伽勝地重煥金仙緇白來往接踵摩肩爰有陳
公念茲法筵篤生其人乃在西川水乳投契寶函芝
蓮杖笠來此帚上花旋英豪蔚起戒律蟬聯未踰一
紀百廢具宣智師有記事豈偶然公之偉業已載前
篇事以寶貴質用素堅著之穹碑億萬斯年

演戒序

釋性統

人自昇賦以來完然天真純一無雜諸緣不擾內心
明潔迨夫物與物交不能不逐境隨緣起諸罪障致
喪天真耳是以我佛世尊于拈花直指之餘廣設律
儀嚴列戒相以防末法比邱蕩越之咎使人人識相
護持依律束身漸至因戒生定因定生慧而拈花之
旨不外于舉匙捧鉢之中孰謂律之無裨于宗也哉
予以丁卯歲承乏補陀之鎮海緇衲雲集單提向上
以接方來恭遇 和碩裕親王普施三衣鉢具于天
下名山巨刹而普陀居其首于是建壇歷年設放三
壇大戒祝無疆

聖壽永昌歷祚風雨時若民物熙和凡諸新學比邱得
戒已復彙爲同戒錄請序于予是亦協報國恩敬師
重友之至意也然諸比邱果于舉匙捧鉢間觸發拈
花的旨識得師友籍貫名字究從何處得來則師友
時時現前佛恩圓具一時報稱予誠有厚望焉是爲
序

法雨寺鐵觀音記

前人

丁卯夏四月予始承乏茲山大殿久廢卽以大智祖
師影堂供大士香火初夜匆冗未暇審觀次日晨起
禮佛見座上一像高首高可三尺餘肩以下全驅俱

無心甚感愴謀欲徙置他處舊殿主徹凡進曰不可
此佛首嚮得自千步沙水中因放光現瑞故供于此
諸耆舊遂言康熙十二年遣界十三年秋偷界小船
數十隻泊千步沙夜忽火光燭天諸船互疑失火且
視船無一爇者相與尋覓沙際則此佛首者巍然在
焉不知何所從來衆始恍然曰夜來之火乃佛光也
因昇送寺中供養已久予感其言止不復遷次年春
三月江南善士武雲山領衆進香稔此靈異請往金
陵鑄造予禱而送之奠其早畢衆緣而返寺也自到
江南善信朝禮不分晝夜不出一疏施銅鐵者日以

千百計有縉紳楊公女年十六許風三年母徐氏賁
金虔禱次晨其女步履如飛又有貧家子爲隣持一
小釜助資貪其完固以已破釜易之夜夢伽藍索釜
還驚寤而病送釜至厥懺悔始愈諸如此類不可殫
紀于是閩省風動不兩月聚銅鐵十餘萬勛妖人方
某者虎視而耽耽焉計取其資不遂捏詞與訟郡守
某亦陰覷其利禁不許鑄陸寅生者豪傑士也義憤
不平訴之江常鎮道劉公公知奸民之利金也大批
牘尾令速鑄郡守遂不敢難不數日守以事被逮方
某亦膺惡疾日夜號叫不已大士全身卽于十一月

鑄成復以餘鐵鑄五事磬板等項次年三月歸山觀者如堵歡呼震山鎮海之興實基于此予謂是雖武雲山之力實大士靈感所致也試思三十二應何處不周或現半身或現全體以至一首一足皆令人不可思議測度其示人禍福之幾速于影嚮大士雖未嘗屑屑于此而若或使之足以使人趨善懲惡而不能自己也是爲記

智祖殘碑重現記

前 人

甚矣祖師願力之洪且堅也普陀法雨寺創自大智祖師師事功巔末詳見本傳不復載當其示寂之日

告衆曰茲地乃大士現靈之所老僧開此道場莊嚴
香火但以事方肇造未能極盡規模今已矣待百年
後再來重興耳汝等記之師沒後廢興不一康熙甲
寅海氛大作徙僧內地梵宮琳宇變爲鹿豕之場歷
十稔

皇上威德覃敷海宇清晏大弛海禁僧徒漸歸是時普
濟寺尙仍故明舊例三方丈各住長老一人無專主
其事者提督陳公暨給諫屠公以余宗門屬爲開戒
師之七世孫明益具白當事邀余主山余不獲辭遂
于丁卯四月承乏法雨寺事至之日荆榛滿目瓦礫

成邱闢治三日始有徑可達故寺之址其西北隅朽
屋數楹明公守之皆取旁道出入師之方丈遺像在
焉儼然無恙明公遂述智祖遺言謂今將百年而和
尙復來重興之願其可卜矣余唯唯不敢當及徵師
洎泥年月以久遠失稽對余惻然久之嗣是薤草結
茅持律說戒四來雲集鉗錘漸舉獨春秋之祀雖謹
而示寂之期缺如徧訪耆老俱不能得文獻無徵之
感益不能已辛未三月春會應接煩苦一日信步緣
山麓潛詣祖塔意圖暫避喧囂耳跌坐小憩面對塔
幢偶見苔封破處若有字畫痕命侍者磨去苔蘚得

字三十一行第一行署曰大智融禪師塔銘余喜曰
塔銘在是寂期可考矣但其中字畫半存半滅磨第
十三行中有曰萬歷甲戌遊蜀鑿華第十七行中有
曰庚寅泛南海第廿三行首有曰五月三日午時跌
坐而逝餘二十二行沒者過半年復不可考又磨二
十六行中有曰越明年癸巳皇太后復命吳某等奏
請金幣香燭供殿兼爲建塔等語明年癸巳始建塔
然則示寂在壬辰五月無疑矣獨庚寅泛南海壬辰
卽示寂首尾不滿三年建業何能如是其速疑寅字
有悞當係辰字由庚辰至壬辰十有三年庶幾近之

後得山志考師行實入山之年果係庚辰建業一紀
規畫始全示寂之期確乎不爽于是又從萬歷壬辰
數至康熙辛未恰合百年乃命工瀋墨爲帖徧給師
之法眷屆五月羣集先覺堂爲師展百年之祭惟明
公往閩募木未歸至七月得大將軍施公巨艦載木
千章浮海而至亟命鳩工至十二月而殿成重興之
期果符師旨抑余何人敢當再來耶第思自展復後
朝山之士登師塔者歲以萬計胡不見之他人而獨
見之余也卽余住山五載節蜡告享月常數過胡不
見之往時而獨見之是年也卽是年若見于五月後

亦無從號衆致虔而適見之于三月果誰爲之也卽
明公往闔募木業經三載歸運恰值斯年造殿選吉
又值斯時是又誰爲爲之也余故曰甚哉祖師願力
之洪且堅也爲詳記于左以告後來者按舊志大智
萬歷八年來
普陀結茅名海潮菴是記以爲庚辰確乎無疑矣但
舊志又云萬歷十八年天然師大智示寂衆舉天然
爲作持則當是庚寅非壬辰也壬辰乃二十年矣所
云百年者舉成數耳萬歷庚寅至康熙辛未亦可云
百年也况 聖恩發帑又已先在
已已乎別公蓋未詳考舊志也

梵音洞建閣記

前人

今上御極之五十五年春三月滇南撫軍甘公委員來
山啓建祝釐道場手書示予曰前者承乏甬東願于

梵音洞石梁上建一閣上供菩薩下爲朝洞人士禮拜之地年來官塵鹿鹿尙未得遂今沐

聖恩節鉞滇南特遣家人資金望和尙卽爲興建成此善果予思我公誠敬篤信固其素志然久而不忘益見其敬信之至也方其涖官甬東乃在四十一年間歷任登萊憲副江蘓臬臺山東藩憲祝釐進香之使歲不絕人今撫滇疆遠去萬里甫一載卽遣使以完前願非誠敬篤信之至何以有此閣高二丈三尺深齊石梁廣亦如之于本年四月鳩工中秋告竣洞口向東南閣門對西北當夫皓月虛懸水光蕩漾大士

之顏如玉也旭日初昇朝霞吞吐大士之唇如珠也
煙霏則翠鬢凝雲霧湧則縞衣映雪至若風雨晦明
之幻變波濤澎湃之震驚登斯閣也莫不神化情移
真有得于大士之現相說法迴出于尋常之外者是
閣之助發于大士光明無盡藏卽公之培植名山香
火非淺鮮也予亦烏能不詳誌之公名國璧字立軒
奉天正藍旗人

重修宗譜序

釋照機

四明名山大刹以補陀爲最大士現靈于前高座禪
宗似續于後奕葉傳燈皆井然有序而不可紊普陀

寺中興于始祖普賢嘉靖間我十世祖本空師卓錫于此精專五戒悟空五蘊遐邇嚮化適遭倭變朋徒西竄遄歸姚江之玉皇殿聚徒薰修隆慶間總督劉公迎回山中避居西天門之圓通菴焚脩益虔講誦不倦遠近聞風者莫不奉爲金仙尸之祝之于是歎空師之道力爲能與佛祖靈山相得益彰也海氛內徙鞠爲茂草者十餘年機率徒侶隱居先覺悵焉南望非朝伊夕今際

天子聖明海隅清晏得返故林而空師之遺迹煥然一新是亦普陀興廢之一大機也舊譜序于明周侍御

公惜其年久漫漶僅有大畧乃偕玄孫心明修輯而
新之夫自嘉靖迄今不及二百年而廢興者再亦可
以知世事之無常而先澤之可恃矣願我子孫永守
清規努力精進歲事俎豆綿綿不息庶幾始祖普賢
及空師之衣鉢重光而普陀之香火弗替不負機拳
拳修輯之至意也

磐陀石普慧禪院脩建碑記

釋通旭

梵刹之興既有道德者主乎其中亦必有福德者助
乎其外然後功業成而名聞著此同行與外護俱稱
善知識而不可一日相離者也磐陀普慧禪院宅幽

而勢阻地廓而形藏自西天門盤結其下與大寺不
里許而近步履坦如喬木蔭如望之知爲藏脩勝壘
也自內徙甫復楹椽具在鐘磬無聞時住持道恒禪
師同舊住慈德請省機大師居焉師名超象翁洲人
受度于普陀拳和尚嗣法于南澗濟老人皆海內名
宗匠視父知子宜其卓犖不羣而又得居士凌某等
時來盤桓其間質疑問道輯故鼎新此誠財法二施
等無差別者也大師契單傳之旨追面壁之風杖履
蕭然不顧口頭生醜洵爲滄波遺珠而居士于風塵
世路之中栖心物外時渥檀波增輝林麓可謂善得

進修克昌厥後者矣今日把手盟心無分縑素當來
同歸淨域寧有優劣者哉是用鐫石掄揚不惟表二
公之德業且以勸善人

百歲老祖宗譜序

前人

夫萬派之泉必溯源而出千丈之木必托根而固會
是者年碩德光前垂後者可不特爲表彰以示不忘
乎予自承主此山旣表普賢道誠禪師爲合山之祖
其孫四而本空圓獻禪師爲西天門祖其徒三而無
瑕明通禪師又爲旭等數十家之祖也無瑕通祖聿
脩厥德勵行純全壽登百齡爲世福田受徒十人皆

英賢鉅畧增重名山若吾宗奇峯才祖尤其傑然者也探本窮源非德厚流光而能若是乎古人視履考祥本諸身徵諸子孫有不彰彰較著者哉是用前歲旣新其墓今歲另系其譜烝嘗必恪後進必書樹名山之赤幟昭來學之司南謂非法門之盛典歟惟在後之子孫永言繩武弗替引之卽是百歲老祖長在而不滅矣故特表而出之以示不忘云

普陀潮音禪師塔銘

有序

釋本晝

禪師諱通旭字潮音江南華亭俞氏子也方總角時每見僧輒喜食至卽擊木作鳴榔聲或問之曰吾集

衆以會食耳父母嘗疑此兒前世必僧徐携至普陀旃檀林削髮爲沙彌謂之曰使汝他日得成佛門法器不勝居吾兩人膝下乎師點首而喜年十五六聞人有談及已躬大事者心竊感傷不已後值海波不靖遷僧內地乃走依白龍鏡公乞稟具戒一日偶坐廊廡間會新篁解籜迎風而下覩之忽有省徑往叅前住天童智公機語不契歸堂遇同學舉及大慧竹篋子話當下釋然久之入天台慕古人厓居穴處以終夙志因謁萬年無礙徹和尚徹徵師所得未之許異日入室投機乃大喜卒以衣拂授之已而出應慈

水之壽峯姚江之聖壽居皆未久後有以普陀初復聞者師遽喜曰此吾童年脫白地也卽命束裝徧訊山中耆宿適定鎮藍公爲國進香願殿宇傾頽慨然思得一道德兼優者以主斯席合山緇素競以師對公一見契重卽出

上賜帑金若干兩俾爲建造費師堅辭至再公率僚佐敦請于時座下四衆環擁雜然稱嘆曰近百年來未經見也山前忽有五鹿奔至羣拱而立若聽法狀大衆異之以爲法運之祥嗣後公卿中貴多繼踵而至祝釐訪道無歲無之故師之主席此山年未逾紀百

廢俱辦中興之盛遭遇之隆或比爲元之孚中信禪
師非過言也師體弱性恬退憶方盛年行脚時侍余
會稽化鹿山中恂恂若訥後已先人故一時同學輩
喜與之交而敬畏之今予晚居太白望公普陀海山
角立如隔咫尺兼以歲時往來手書無間其法喜相
得之樂復宜爲何如比也康熙戊寅冬十有一月師
示微疾擇日上堂說偈辭衆退歸丈室顧語左右者
曰吾生平出處歷履無過人者身後汝輩不宜妄干
達官聞人以作碑銘飾其所無如不容已其惟天童
老人乎天童知予深且悉其言當不我誣爾言畢趨

寂嗣子明忘心明等卽日以師計至予時驚歎不已
爲位哭之不覺其慟公年方五旬而逝予年七十有
七而留斯豈法門之幸乎頃師五旬之誕予以長歌
一篇稱壽中有千里吾宗駒更誰金峯坐斷何屣屣
之句法運一絲日趨而下嚮所屬意于公者今其已
矣悲夫公世壽五十僧臘三十四有全錄若干卷行
世嗣法弟子或顯或晦分布四方者繁不具載其果
明諸子以癸未年八月十一日吉時葬師全身于寺
山之右今繼師席者忘與果而佐忘與果者明也三
子賢能世其家可謂不辱于師者矣因賫師行畧并

述師遺言請銘于予予奚辭銘曰海水練張海山劍
銜世塵罔到中有覺塲其替也久至師而昌侯王恩
賜數異尋常戶履之消登至四方鼓鏡鏗爾不倦稱
揚荆棘之林魚龍之鄉旛花成國儼入衆香居幾何
時遂疲津梁山腰翠堵雲木蒼涼面目現在師其不
亾

法雨寺重建神鐘復歸記

釋明智

昔我大智祖師誅茅除菌以啓道場不十年道聲宣
布達于禁園中宮降幣慈聖供旛生受賜紫歿蒙建
塔自非寔修成否奚能然矣乃今而知其眷戀于開

山之塲示靈昭著真所謂魂魄猶當依此者師臨寤
曰寺後當火俟天然茶毘後卽移吾像他徙後寺果
以天然茶毘次日燬又曰百年後吾當再來重興迨
康熙己巳發帑重修恰符百年是祖師于寺旣能知
廢又能知興且能確知時日毫無有爽

聖祖仁皇帝賜恩脩建師旣前知而謂

今上重加典造恩典逾隆師有不昭知爾灼見者哉寺
有鐘爲祖師手鑄者康熙四年夏東夷蹂躪寺藏如
洗鐘亦被載至咬啣以國門頓然體重百人舁不可
動遂寘城外土埋沙壓六十餘年矣雍正二年余爲

監寺有自洋來者云彼處近忽放光地下晝夜作雷音吼衆異乃掘之而鐘出焉歎識故普陀物也余託洋商陳豐觀往請六年歸至南灣適余族兄良彬鎮兵于灣余又託爲轉致來山旋兄陞授提督駐師廈門乃爲致書新灣鎮併閩浙總制及浙撫軍轉諭地方浮載歸寺時寺于九年蒙

聖恩發帑數萬專官督建余謬主法席經理三載至十一年工竣

萬壽聖節數百僧方焚香虔祝鐘忽報至羣相驚喜以爲異事余思鐘既有靈倘于被載之日卽重不可昇

自不至飄于外洋又倘早示靈異亦不久埋塵土且
既歸在滄洋船無歲不抵南海徑可載回余兄既已
受囑則又何難浮運立致顧乃飄蕩數萬里之波埋
沉數十年之土必待好道之

君神聖首出而始示靈現異又必遲回數年紆徐宛轉
以俟道場鼎新

聖壽釐祝之日而始歸來復還故處噫此其故實有冥
冥而昭昭者矣

皇上重道好善大發佛心寶繼

先帝之志顧前此興建百年之數祖師言之今茲興建

祖師不言也乃不言而未嘗不知之放假之鐘以顯其意蓋一于鐘吼之期示法運之將興而一于鐘歸之辰戴

皇恩于永久也抑又聞之祖師之將開此山也禱于大士忽見巨竹一根自千步沙浮來曰此菩薩授我也遂取爲椽結菴此與不肯去古院爲佛親選道場者何異祖師之眷戀于斯則菩薩之眷戀于斯可知彼鐘之往而復歸特靈光呵護假之以示聖教昌隆之會耳夫豈一鐘之故哉獨是先年中興有我別菴師祖道行淵深足副百年再來之語今則

聖恩逾重負荷逾難余涼德鈍根豈能仰承門基以應
昌運然而祖師之真靈長在卽一鐘可窺其微矣故
不辭不敏而爲之記

法雨寺齋田碑記

前人

蓋自百丈祖師首以開田說大義而僧家始得有田
誠以供佛安衆惟田而後有所賴藉也普陀山瀕海
鹵瘠法雨故無厚費雖以我師祖別菴和尚荷

九重之寵眷受十方之皈依而視人猶已不肯私自封
殖其舊所有山尖產業又復狂濤嚙崩十去七八雍
正九年蒙

世宗憲皇帝聖恩發帑數萬遣脩殿宇當道重其事令
合山兩寺公舉道高德厚才望爲衆所服者主法席
衆以智爲別菴嫡乳諺以智應自顧何人敢膺斯任
固辭不獲入寺而困廩空虛粒顆無貯噫徒咬菜根
其又如何可以做事也拮据支撐三年工竣幸無獲
戾乃今而更有難矣以佛祖之靈名勝之地又重以
朝家隆重脩建之恩房宇整潔則廬旅不可或曠瞻禮
駢集則經理不可廢職人宜多費亦宜多費宜多而
田則故無多也儒經云何以聚人曰財搏沙作飯雖
巧難炊矣幸善信俞君茂甫魏君承祖等覩貧婆之

淡因發菩提之善果開彙捐金俾余購置共田地一百二十三畝餘以爲香積伊蒲之供雖經費浩鉅尙須廓而大之而楊枝一洒功德已爲無量余道緣淺薄祇懼大衆無以相安致辱師祖之門基墜我佛之靈塲而上辜 朝廷崇建高厚德意爲兢兢受茲檀施彌生慚愧惟後之人世守勿替且增而益佛地有光而諸檀信之福田耕穫蓄畚日植不忘毋鹵莽毋滅裂其乃有秋是余之願也夫爰列衆善信芳名及田地之坐處畝數鐫于碑而記之如此

重脩法雨寺下院桃花渡真武宮碑記

前人

古來移風易俗類多建置梵宇道場假之佛以轉其機其始有人開之其後必有人成之乃可久維而不敝郵縣東北三里桃花渡者舟楫絡繹遊冶者羣聚爲牟利藪明萬歷二十九年邑宰魏公成忠下令禁逐卽其地建宮以奉淨樂由是穢雜之區遂爲清淨道場矣其爲普陀法雨寺下院者則國朝康熙二十五年永慧禪師自法雨分住于此始也維時法雨我師祖別菴和尚道行宏深際遇休隆荷承

聖祖仁皇帝頒賜眷顧天寵頻加四方函香頓禮者雲

集電奔皆以是院爲接待之所停驂買棹而後航海以達于山人皆稱便載在寧波府志及本寺山志班班如也歲辛巳興安信士陳君大施願力倡加脩造而後圯頽者整湫隘者闢魏公香火之場再覩莊嚴而緇侶庇焉報本崇功開創之與脩成均所難沒院中塑陳君像以配魏公非過也雍正巳酉信士陳君又于殿前重葢茶亭而往來者憩息有地矣第瀕海龍風屨雨殿閣壞朽爲易辛亥余謬主法雨山席蒙世宗憲皇帝復發佛心賜數萬帑重脩法雨大寺 欽工重大敬謹經理歷三載而後竣工故未暇計及斯

院之敝漏也幸李君諸檀信又復捐貲鳩工再謀繕
理諸君亦興安人是與陳君先後有大造于斯院也
余生長闕中于興安爲在家桑梓顧諸君非獨爲余
也綿聖神之香燈脩賢宰之勝蹟廣十方之接待河
沙功德又得而計量乎哉是則祝釐祝延大寺永頌
無疆之

聖祚而報功報德斯院亦長植衆善之福田其可不垂
示久遠使後之飲水者羣知源之有本也耶爰貞諸
珉而記以誌之焉所有衆信芳名詳列碑陰

重修南海普陀山志卷之十六終

重修南海普陀山志卷之十七

粵東歸善黃應熊飛渭叅定

古閩同安許 琰瑤洲編輯

法雨住持釋明智法澤校訂

歷代詩咏

遊洛伽山

宋

臨川

王安石

時爲
鄭介

山勢欲壓海禪宮
向此開魚龍腥不到
日月影先來
樹色秋擎出鐘聲
浪答回何期乘吏暇
暫此拂塵埃

遊補陀

以下元

吳興

趙孟頫

翰林
承旨

縹緲雲飛海上山
掛帆三日上孱顏
兩宮福德齊千佛

一道恩光照百蠻
澗草巖花多瑞氣
石林水府隔塵寰
鰕生小技真榮遇
何幸凡身到此間

遊補陀

盛熙明

驚起東華塵土夢
滄洲到處卽爲家
山人自種三株樹
天使長乘八月槎
梅福留丹赤如橘
安期送棗大于瓜
金仙對面無言說
春滿幽巖小白花

夕泛海東尋梅岑
山觀音洞遂登盤
陀石望日出處

吳萊

山月出天末
水面生晚寒
扁舟劃然往
萬頃相渺漫
星河白搖撼
島嶼青屈盤
遠應壺嶠接
深已雲夢吞
蟠木

繫予纜扶桑纓我冠寸心役兩目少試鯨魚竿

其二

起尋千步沙窈石塞行路怒濤所縱擊徒以頑險故卓
哉梅子真與世良不遇上書空雪衣燒藥迺煙樹玄螭
時側行縞鶴一迴顧從之招羨門滄海晝多霧

其三

茫茫瀛海間海岸此孤絕飛泉亂垂纓險洞森削鐵天
香固遠聞梵相俄一瞥魚龍互圍繞山鬼驚變滅舟航
來旅遊鐘磬聚禪悅笑撚小白花秋潮落如雪

題昌國補陀寺

丁鶴年 高士

神鼇屹立戴崔嵬俯瞰滄溟水一杯積翠自天開
布金隨地起樓臺祈靈漢使乘槎到傳法梁僧折葦來
若使祖龍知勝槩豈應驅石訪蓬萊

其二

昆明劫火忽重然宇內名山悉變遷古刹獨存龍伯國
豐碑猶記兔兒年三更日浴咸池水八月潮吞渤海天
雲漢靈槎如可御便應長往問羣仙

普陀大士橋

劉仁本

金碧玲瓏塔影雙綺霞香霧濕疎牕皎人纖浪爲羣蓋
龍女持珠獻寶幢震海風雷音縹緲山潮汐嚮春撞

願求示現將軍相一鼓羣魔盡攝降

遊補陀

以下明

昌國

張

信狀元

浮生同一夢感槩憐我情文章祇覆缶鉛槧總頑形拂
茲蘅竇下凌彼天之層和風灑雲龍清樾培佳程睠言
遊仙侶趣趾成蓬瀛

洛伽山望梅

新會

陳獻章

名臣

元氣茫茫混太虛天吳簸撼蕩坤輿千年木石勞精衛
百谷波流會尾閭月下明珠鮫女泣雪中飛觀羽人居
秋風吹老珊瑚樹不見麻姑錦字書

其二

一花初起白龍堆萬騎長驅石壁開碧海有山都是雪
青天無雨只聞雷秋高鴻鵠排雲去夜靜蛟龍出穴來
借問乘槎向何處五雲咫尺是蓬萊

寶陀禪寺漫興

前人

寶塔凌空十丈高倚欄南望際鯨濤天花散處皆金地
海月生時見玉臺夜氣澄清龍在窟秋風蕭爽鶴鳴臯
丹梯咫尺諸天近香霧霏霏濕苧袍

贈補陀僧

前人

僧言海上來會上妙高臺瑞相天浮月潮音地送雷沙
如金粟布山似碧蓮開雨帶龍腥過雲隨鶴影迴幽樾

還得寶徑渡不須杯我有登臨興南詢識善財

補陀山

嘉興陸光祖太宰

天抱琉璃宮鼇柱不見底誰騎香象來明月弄空水

其二

山椒石壁寒沙岸水痕泐濤聲日夜喧禪心自空寂

其三

白馬馱經來乃在大海外誰知震旦中有此無色界

其四

寶殿低秋浪疎鐘入夜風身心無處着始悟本來空

遊補陀

鄞邑張子瑄少光祿

麟岫仙界錦城堆寶樹瓊花面面迴勢壓海門鼇背重
光搖島嶼蜃樓開層巒徧向雲間出飛瀑全疑天上來
自是修真奇絕處何須弱水問蓬萊

禮洛伽山

鄞邑沈明臣

三神山遠不能尋惟有洛伽名古今萬里扶桑開四照
九天靈鷲削孤岑一枝鸚鵡多饒舌遍海蓮花不染心
謁罷潮音靈洞口皈衣願發晚濤深

題補陀

鄞邑萬表都督

挂席凌溟泝長風兩鬢颯俄然見宮殿出沒在波濤龍
女呈珠貝如來現玉毫直將超世界詎獨解天戈

其二

不爲名山住將因法喜探波聲搖佛座松色暗經函天
女咸悲仰童真亦屢叅捨家猶畜髮長此事瞿曇

禮洛伽山

鄧邑沈一貫大學士

積水中開梵帝宮孤帆遠引列仙風始知四大浮空住
別有三天護法雄肅拜聖儀明滅裏迴看人世有無中
殷雷頻吼潮音洞何處西方更發蒙

其二

近有三生紫竹綠何須十地與諸天獨騎香象開龍國
故擊靈鼙撼蜃川銀浪秋掀天影澹金輪朝發海光圓

但將一勺澄心地舉目千花盡是道

其三

妙應峯頭披世氣磐陀石上攬晴暉大千毫髮空中見
諸佛威音定裏聞虛叟自隨龍鬱律天香惟與鶴氤氳
三山近立祥河外盪爲金仙駐彩雲

遊寶陀寺

山陰

黃猷吉 僉憲

直爲探奇過上方居然臺殿水中央到知海岸真孤絕
遙望瀛洲亦渺茫石洞寒潮鳴梵唄竹林明月放圓光
鯨波一洗峯煙息曾見慈雲遍八荒

夢遊寶陀山

餘姚

姜子羔 少卿

忽然飛渡海之東海色澄清霄漢通借問此心何所似
白雲映水月當空

遊補陀山

嘉興馮夢禎祭酒

西教東流到補陀金蓮花發映娑羅星河歷歷黏青漢
島嶼纍纍浸白波龍獻寶珠歸象罔僧留香飯與鼈鼉
我來欲發如來藏老傍寒松學鳥窠

登補陀

晚城劉尚志副憲

欲問如來何處尋寶輪空裏海濤深朝看絕島開龍藏
夜聽寒潮落梵音萬頃風雲浮碧玉九天日月布黃金
閩州恍在藤蘿外夢入西方不住心

題洛伽

龍德孚

見前

望來鼇柱森無涯
海上孤懸小白華
說法臺高開寶藏
潮音洞迴湧金沙
扶桑夜沸三更日
祇樹光生五色霞
我亦有冠慚未挂
梅岑何處覓丹砂

寄題補陀

仁和

宋應昌

大司馬

洛伽山浸海波中
大士西來彼岸通
不是世人迷苦海
肯教說法到天東

禮補陀大士八韻

聊城

傅光宅

提學

翠壁千重盡滄溟
萬里開龍宮
吞日月
蜃氣擁樓臺
五嶽誰飛錫
三生此渡杯
地疑人境外
身似梵天回
紫竹

藏鸚鵡青蓮見善財海神聽法至天女獻花來慧眼觀
千界潮聲振九垓皈依持半偈甘露灑塵埃

沈家門阻雨

前人

雲海慈航一葦輕身隨大士踏空行波光東去通夷國
煙島西來擁化城夜吼潮音千壑應寒飛花雨四天明
塵心到此清如水丈室吾將擬淨名

過海潮贈大智禪師

前人

寶地新開大海邊法壇長日擁諸天慈光會滿三千界
苦行先經六十年五嶽煙霞孤錫迥萬川水月一燈懸
不知再見應何日一片心依智者禪

望補陀

上虞顧充郎中

我家世漁瀛海東煙波滿眼青濛濛我生夙抱探奇癖
十洲五嶽期過從金閨一旦謬通籍矯首滄洲思無極
憑誰寄我仙山圖閒卷神飛渺南國秋濤瀨瀚秋雲餘
紫翠中浮小白花瑤光遠映三摩地金色平鋪千步沙
蛟宮鼉極出蟲鼠寶相珠纓示神異慧照孤懸震旦中
慈航飛渡閻浮際一襟水月共澄鮮真歇關頭好息緣
泡影河山忽明滅恒沙世劫幾逃禪馬首京塵幾十丈
西風吹滿青袍上苦海冥冥日望洋津梁咫尺徒神往
題絨爲報大將軍莫散散古散字前志磯頭白鳥羣他

日浮槎指南海相携同禮白巖雲

題洛伽

時寺徙候濤山

濟南

李攀龍

憲使

洛伽山上古祇林白馬西來峽口深
月出爾時樓閣影風還如是海潮音
若非鸚鵡原能語誰解蓮花不染心
五十三員知識盡可勞踪跡問浮沉

題補陀

盱眙

李言恭

臨淮侯

五嶽三山總浪遊法門高敞海天秋
窻前雲氣蛟龍起檻外波光島嶼浮
月映寶珠明上界星隨燈火散中流
黃塵白髮真無賴彼岸慈航何處求

寄題補陀

前爲寧郡守

同安

蔡貴易

按察使

憶昔分符日相依祇樹林天留最勝地佛照不溜心海
日蒼崖曉蓮花碧水深爲民遙頂禮願普恒沙金

聽女善財洞

梅魁參將

雪膚蒼貌紫霞裾幾駕蒼虬下碧虛踪跡尙留青海上
珮環遙向玉樓居雲封洞口塵氛寂潮漲沙頭月影孤
欲就此中求至理本來妙相一明珠

贈僧遊吾詣闕還

屠隆見前

飛錫朝天闕浮杯到海東行蹤都不住教觀本來空寶
月潮音外經臺花雨中精脩久自悟覺性了圓通

遊補陀

前人

蘭若孤懸大海中山根四面插蛟宮浪推旭日排天出
風靜涼蟾照影空異鳥聲和仙樂細靈鼈背閃佛燈紅
神州別有三摩地況與蓬萊咫尺通

其二

不斷潮音響石淙蒼厓陡絕杖孤筇天浮島嶼雲帆亂
殿壓鼉鼉雪浪春會共鳥窠參了義還依龍藏討玄宗
日斜空水澄如鏡微有冷風送暮鐘

其三

獨上盤陀四望寬青螺一帶抹煙巒樓沾蜃氣全疑濕
潮落沙痕半未殘波面紅蓮開十丈巖前紫竹長千竿

揭來頓悟圓通理手挈銅餅汲巨湍

其四

不因禮佛到翁洲那識乾坤屬一漚欲就此中超幻劫
更從何處覓閑浮雲光佛日三千界海色仙人十二樓
幢蓋蕭蕭金磬冷碧山黃葉寺門秋

其五

翡翠臺吞島樹冥珊瑚簾控海峯青香船暮客帆投浦
寶塔霜鐘月在鉶聖主紫泥封賜詔內官黃帕捧函經
人非人等俱聽法夜半龍來殿不腥

其六

扶桑日出曉蒼茫
森森行空一葦杭
誰劈銀濤開寶界
直扶鼇柱駕金梁
僧歸雲水袈裟濕
佛散天花宇殿香
悟得無邊先及岸
了知東土是西方

其七

何來鷲嶺削千尋
大士端居紫竹林
日月高窓懸石扇
煙霞古洞嚮潮音
五雲瓔珞莊嚴妙
七寶琉璃般若深
菩薩泉名功德水
但教一洗盡凡心

其八

凍雲時有鶴來歸
舟楫雖多雞犬稀
絳月夜侵龍女襪
碧雲秋冷梵僧衣
祇因海浪兼天遠
轉覺香臺與世違

塵土劫灰都不到蓮花開落是禪機

竹菴住持補陀賦贈

俠氣縱橫汾晉間忽然披衲掩松關
宮中親賜朱衣出海上遙賚丹詔還
佛土已收爲上足君恩更許住名山
玉毫光裏如來現十丈蓮花雪浪灣

補陀十二景

存七

前人

梅尉丹爐火不溫疎枝淡月島烟昏
只愁海叟吹龍笛擲落羅浮萬樹魂

梅灣春曉

龍宮蛟室霧縕細幾樹珊瑚認未真
雪裏頰霞高十丈紅綃恐是獻珠人

茶山風霧

海濤飛雪復春雲寶殿疎鐘入夜分潮自碎鉤僧自定
悟來原不是聲聞

古洞潮音

波上芙蓉盡著花香船蕩漿渡輕沙珠林只在琉璃界
半壁紅光見海霞

蓮洋午渡

博山突兀海孤懸日對軍持大士前不用旃檀然佛火
曉來嵐氣自生煙

香爐翠靄

熒熒一點照迷津光奪須彌日月輪萬劫靈明應不滅
五燈傳後與何人

洛師燈火

蕭蕭古寺白燈生童子烹茶煮石鐺門外不知飄急雪

海天低與凍雲平

靜室茶煙

贈遜吾上人

臨海

王立程舉人

開山初出定狎海久忘機身後能生慧燈前可付衣潮
空千佛現鐘午萬僧歸喝下青蓮座煙霞獨掩扉

贈翠崖上人

前人

大士端居紫竹林高僧入定翠崖深翻來貝葉將千遍
證得蓮花不二心頂上泥巢迦鳥戲耳邊銜瀉海潮音
燈前欲問西來意衣鉢何年直到今

贈玉峯上人

前人

一片禪心定雪山欄杆千尺翠濤灣袈裟影裏金光聚
知是長安日下還

贈大智禪師

前人

誰識空門不易脩，羨君未劫早回頭。
披來布衲峩峩雪，坐處蒲團滄海秋。
龍象上方開佛土，金銀下界見閻浮。
却留紫竹林間影，五十三參何日休。

秋日送昱光上人還南海

永平王渾然知府

杖錫雲爲侶，西風玉作林。
雁橫天外路，霜斷月中砧。
不在因緣趣，無端來去心。
一航仍大海，還聽舊龍吟。

贈守拙上人

鄭邑董應震

靈潮噴湧洛伽峯，高衲西來訂覺宗。
滿座清風閒挂錫，一軒明月自扶筇。
經翻貝葉堪消暑，饌煮伊蒲可作供。

我愛逃禪惟剩髮無妨寶筏每相從

送廓哉上人歸普陀

通州

顧養謙

總制

出山從作客經歲亦思家行泛東滄海言歸小白華聖
光來水月旋思賦風沙竹色仍看紫潮音聽更賒但知
禪慧力忠信未須誇

贈竹菴師住補陀

王穉登

山人

水月澄慈性風塵暗法顏詔從金殿出袒挂紫衣還屨
氣浮香刹鼉身負寶山素川天萬生何處是鄉關

贈遜吾上人

前人

衲衣藤笠遠從師足踏蓮花渡海時高浪如山心似水

右肩偏袒執軍持

竹菴上人自闕還山賦贈

無錫

龔

勉

布政

爲檢蓮花藏乘潮報至尊
獲沾新露澤仍返舊雲門
錫振山頭月杯浮海上村
此來應有悟去去復何言

贈敏菴上人

長洲

管志道

僉事

竹杖芒鞋百衲衣飄然山海片
雲飛爲探龍藏傳心印
寒雨空巖自掩扉

送補陀潤渠師自長安禮五臺

鄞邑

沈泰冲

舉人

海雲無端百千色爲向吾師送
飛錫蓮花洋畔香蒲衣
冷然御風來比極憐予寂寞
不得意乍吐玄言解愁慙

玻璃鏡底照重昏，鷓鴣網中開六翮。
片時置我松風間，滌盡煩襟坐蕭颯。
卻月之遊未便忘，倏忽棄去心轉惻。
五頂名山亦化城，師今一往問消息。
文殊拈花梵刹竟，何事恒沙勞羽翼。
試與海中洛伽山，誰是如來真託跡。

贈守拙上人

鄭邑

余

寅

太常少卿

汝復揚帆海上行，高天寥廓候濤生。
新成法界叅龍藏，遠涉恩波出鳳城。
唄梵屢聽紅旭早，雨花長接翠螺平。
殷勤更許酬賢達，使者遙知徹聖明。

題洛伽

餘姚

呂胤昌

吏部郎

絕島波間度空門，嶂裏懸齋厨隨雀。
至野衲近蛟眠叢。

蔚蘿侵戶紫紆竹溜泉玻璃千萬頃水月映人天

送了然上人歸補陀

通州陳大科侍郎

藤杖霜寒又拂衣梅花香處送君歸他年叅得無生訣
小白萃山共掩扉

贈無邊上人

鄞邑余詠

從君說法了玄機相憶檀樂坐翠微覺海無邊誰悟得
自臻波岸始皈依

贈大乘上人

前人

碧浪粘空蜃海平芙蓉朶朶繡如城請看夜月蓮臺上
若箇真騎大象行

贈大乘上人

鄞邑

章載道

幾度會逢海上僧禪心一片水雲澄也知開覺都名理
妙法還須禮大乘

贈昱光上人

鄞邑

管萬里

飛鉢何年到海懸六時鐘磬法王前天生一片珊瑚舌
遍說三千與大千

題洛伽

前人

古佛何年到海岑紫雲爲幕竹森森藏真咫尺蓬萊島
護法莊嚴蘆荀林風靜磬陀開寶界日春厓洞湧潮音
頻迦異鳥聲聞切但說排山地布金

補陀歌爲勝林上人賦

南粵韓上桂舉人

補陀之山大士宅金光幻作蓮花色
簸空雪浪洗扶桑相去蓬壺看咫尺
中有彌天大慧僧欲續如來不滅燈
緒經了義無一字卓錫人間自在行
閒過南海參龍象水月光中窺寶相
廣施甘露灑菩提永超苦海無邊量

贈奇峯上人

慈谿韓昌祺

豈因吾道轉將南錫杖
芒鞋笠獨擔野徑何從尋幻跡
禪心原自印空潭
雲籠草樹枝枝綠日照峯巒
點點藍獅象座前聽說法
天香爛熳是優曇

禮補陀訪守拙師

鄞邑董光燁舉人

脩然宇內恣探奇佛界慈航任所之島嶼獨標孤利勝
皈依共向法王慈崢嶸臺殿輝金碧馥郁香煙結虎螭
欲叩靜廬何所問蠟扉邂逅慰襟期

贈法界上人

鄞邑高萃郎中

無事經年別遠公帝城鐘曉憶西峯爐煙燒盡寒燈晦
童子開門雪滿松

題海潮寺新賜護國鎮海禪寺額

鄞邑陳九思

東表神洲浸大瀛盤根無地巨鼇擎琳宮又創天開境
寶號新頒帝賜名佛火夜懸龍藏曉海靈朝結唇樓明
香船萬里颿千葉得渡爭誇彼岸行

題補陀

勤邑 屠玉衡

孤峯截嶽帶蒼苔，紫竹林端講席開。
擊鼓馮夷驅浪至，獻珠龍女挾潮回。
經繙貝葉聞清梵，座擁金蓮結寶臺。
一片空明浩無際，遙瞻宮闕近蓬萊。

其二

盤陀石上散晴霞，金粟林間四照花。
日落巖前發疎磬，夜深水際泛孤槎。
千秋香火真如地，萬國梯航大士家。
愧我凡夫遙頂禮，欲從蘭若問三車。

贈元初上人

前人

聊爾混塵俗，超然絕世氛。
青天飛一錫，白甌入孤雲。
海

際龍巖窟山根麋鹿羣名藍留半偈言下了聲聞

贈普光上人

前人

優曇花發定中香衣裏明珠是密藏黃葉止啼都不著
悟來本地好風光

其二

日落澄波影太清楊枝甘露注磁罍晚來初出那迦定
一片銀蟾水上明

普陀山寺與新住持週公爰拜左善世之命賦此

爲贈

周應賓

見前

紺宮翠嶽海中開更有東林大辯才祇舍界分成淨土

昆池劫盡識餘灰
鐘聲遠振龜鼉窟
幢影高懸日月臺
何幸聖皇知宿德
紫衣降自九重來

補陀贈無邊上人

前人

海上名峯幾度逢
久從初地叩高風
青山不厭逃禪客
白社能容嗜酒翁
雙樹聽經依鷲嶺
一杯持鉢入龍宮
月明千里潮如砥
遙憶維那住海東

贈玉峯上人

前人

性癖從來懶見人
掩關不出動經旬
科頭亂帙花陰下
慣看庭前燕雀馴

題補陀

鄭邑

丁繼嗣 巡撫

天下名山說補陀孤懸海曲傍巖阿雲蒸遠岸龍光躍
日照層巒蜃氣多晴晝幢旛開霧靄清宵鐘磬起鼉鼉
滄溟地僻人稀到喜共胡僧逐隊過

初到普陀偕奇峯素明上人閱慈雲石次周君衡
韻

前人

皈心來寶地躡足上慈雲泉溜穿厨入曇香滿院聞縱
觀蛟蜃窟閑集鳳凰羣何幸逢林遠幽探絕世紛

禮洛伽山大士遍閱諸勝

前人

日淨齋壇禮上台孤懸絕島殿中開九天龍象擎雲下
萬里鼉鼉駕海來佛火檀然超色界蓮洋花簇護香臺

願分一勺澄心水
洒遍楊枝度草萊

其二

纔從物外謝冠纓
卻向天邊問化城
夕照雲穿窺塔影
夜鈴風遞入松聲
僧施香飯天厨淨
佛散花燈梵界明
到處如來親見面
何須煉藥跨蓬瀛

其三

大士莊嚴下碧岑
巉巖陡絕海濤深
煙籠洞扈青蓮濕
日破林開紫竹陰
天女獻花叅石竇
龍神聽法吼潮音
如何此地皈依切
洗濯塵凡不二心

其四

天門紺闕曉蒼蒼金粟恒沙布地黃露頂團飄僧乞供
皈心珠履客拈香御函特下龍光護浩劫重開鶴馭翔
我亦欲離苦海去誰先彼岸渡慈航

遊白華山菴爲昱光上人題

前人

證果白華嶺超然出世先望空開寶刹枕石聽山泉花
發傳燈後龍皈說法前吾將掃塵慮對爾共安禪

將歸仍赴昱光精舍偕奇峯素明大願諸上人一
齋而別

浮玉新開號洛伽禪宮歷歷綴丹霞一山外囑波臣蕊
萬家中羅釋子家片石祇林仍竹葉孤雲佛座並蓮花

此來何幸逢支遁搔首重過興未賒

白華菴贈昱光禪人

慈谿

袁茂英 布政

白華山上香雲邏青蓮窩裏高僧坐一鉢能將龍性馴
隻履不向虎溪過蒼靄平分紫竹陰清幽首壓雙樹林
幾片天花簷外雪幾陣風鈴松下音栽松種竹知何意
色空妙相應如是大海波濤只淨餅浩劫乾坤元寸地
波濤不撼寸池水長松午夜一龕燈笑撥煙霞進孤影
五嶽名山踏幾層茫茫下界紅塵苦恒河沙衆不可數
老我香山居士流欲傍茅菴問宗祖

題洛伽

鄞邑

李 樞 侍郎

遠闢靈山鎮海東參差臺殿出寒空
窻臨翠靄晴含雨岸撼銀濤夜吼風
羈縻自憐留鈍質皈依尙許悟圓通
霜鐘午夜聲初徹坐看扶桑日擁紅

題洛伽山

鄞邑

徐申乾

鯨波浩渺信無涯帆外名山數洛伽
路入天門清梵近僧歸石洞碧蘿斜
暝霞常映三生石旭日初開四照花
消盡浮生苦海厄應知功德遍恒沙

其二

晨鐘暮鼓度來頻雲隱花宮法界新
不但乘危開覺路直從揀險濟迷津
梅灣月碧生寒夜茶島煙清邁曉春

更聽潮音如梵語千秋濟倒泐無垠

補陀十二景

存三

鄞邑

李桐

萬樹梅花開滿灣冥濛春色駐枝間回思仙尉成丹日
開落隨時待九還

梅灣春曉

山山爭說采香芽撥霧穿雲去路賒製就漫將爐火試
細縕佳氣遍僧家

茶山風霧

雀舌龍團總擅名敲冰煮雪滿茶鐻僧家清福看如此
一縷藍煙竹外生

靜室茶煙

題補陀

鄞邑

陳繼疇

劫後莊嚴古洛伽金錢詔許出官家法輪雙轉三摩地

龍藏齊頌五色霞靈洞千年仍竹葉香林無處不蓮花
等心隨順如相許早向門前駕大車

補陀十二景

存四

丹陽

丁鴻陽

吏部主事

扶桑旭日射朝霞春入疎梅瘦影斜一自星龕依雪竇
只今錯認是曇花

梅灣春曉

珊瑚幾樹傍蓮臺薄靄氤氳鎖不開謾向定中窺色相
分明龍女獻珠來

茶山夙霧

捲雪春雲自古今
濟溟洞口澹禪心
聽來悟入無生處
始信潮音卽梵音

古洞潮音

歷歷雲龕紫竹叢
茶烹石鼎火初紅
禪關盡日無人到

一縷茶烟曷碧空

靜室茶煙

送寂菴上人歸補陀

鄞邑

沈泰鴻

尚寶司丞

餅履隨緣上國遊
禪心不繫返翁洲
青蓮一片依龍藏
紫竹千竿散蜃樓
錫響霜鐘空水寂
燈懸月塔海天秋
五雲重覩莊嚴相
無數煙巒盡點頭

寄題補陀

鄞邑

王嗣爽

舉人

幾回飛目海東頭
天水滄茫擁寶洲
旭日晴霞金界迴
長風巨浪紺宮浮
雲生磐石空中色
月到旃檀象外幽
寄語香蠟問耆鵬
前生曾結淨因不

贈守拙上人

鎮海

薛二表

金界旃檀法海身談空說偈驚鬼神亂落天花可亭月
清光一碧照波臣睥睨宇內日悠悠兩眉不挂人間愁
乘虛飛渡慈航去直欲駕破海天秋貌僕才奢心獨古
更事殘編任辛苦洛伽筆乘多汗漫第恐名賢久塵土
青黃紙上盡萬劫浮名安博不朽業優鉢欲比十輪圓
曇雲蒲楮流千葉西陵高士歸此僧遙遙彼岸誰先登
我亦喜入蓮花社悲將半壁了傳燈

送昱光上人歸南海

蒲州張四岳中書

錫駐長安道言歸小白華一心忘去住雙髻怯塵沙已
覺浮生幻寧辭去路賒慈航應不遠遙望海天霞

贈大智禪師

華亭

袁福徵

刑部

慧燈西竺發分向海中懸入定渾無相出關覺有緣經
翻龍淨鉢禪就鶴開筵我適天然趣圓通亦復然

贈南海翠崖上人

無錫

胡

淳御史

幾年幽夢此山棲水月禪心愧自迷歸到普陀因問我
白雲深處海潮西

補陀贈真語應詔入京受賜還山謁予鄂渚兼致
緯真儀部書賦此爲贈

湖廣

常居敬

巡撫

檄書忽爾破愁顏杖錫何由逗楚關天語向爲龍藏譯
帝城應許鶴飛還赤霞海色迎宮錦白雲秋吟到髻斑

乍覺寒濤江上發丹楓吹遍洛伽山

題補陀

上虞黃之璧

名山梵刹海東開金作禪宮玉作臺萬點慈雲青雀下
半空法雨白龍來依微石室窺無相彷彿珠幢見辨才
誰似神僧杯可渡摩尼自取照蓬萊

潮音洞

通州盧純學

大海靈山迴龍宮豈易尋萬年垂妙相孤洞啓潮音天
削峯成玉沙鋪地是金泠泠俱作梵早已滌凡心

題補陀

武陵龍膺戶部

洞口曇花夜不昏多羅舍利萬年存魚龍跋浪連林屋

鐘磬和雲出灌門色界豈知天下大香臺惟見世中尊
更憐末法誰梁棟爲有生公石可論

題補陀

鄞邑

吳禮嘉 御史

萬里滄茫一寺門慧光千丈擁朝暎孤懸寶相空塵劫
不斷潮聲到竹根風靜靈旛鯨海晏月籠祇樹蜃樓吞
登臺長嘯煙雲裏掃却凡塵道自存

禮補陀山

鄞縣

董光宏 侍郎

東南澤國中往往饒異迹巨海峙補陀大士下所適俯
瞰天溟池懸厓九千尺當時現法身青蓮大如席龍神
日來朝洪濤怒噴射滅沒數點煙天盡地無坼波湧山

勢搖日蒸海氣赤境內萬里舟域外三韓船乘潮破巨
浪亂颿互相躑飯德襲異香拱手晉名壁去年詔使至
旛幢映巖石真如故無言衆生自奔迫遂令瀆滂中今
古長赫奕西方有聖人東海乃其宅我今飛渡來膜拜
恍今昔摩挲薜蘿花四望曉天白忽憶生前事廿年此
面壁

題潮音洞

餘姚 盧元選 進士

靈竅何年著化工嶙峋倒插水雲中浪花飄濕晴飛雪
海月浮光夜現虹石壁雨餘泉出竇旃檀秋老樹吟風
虔誠欲叩如來面雙鶴盤旋下碧空

寶陀寺

南昌李應詔都督

茫茫鷺嶺水雲賒今古莊嚴大士家檻外碧空垂法象
月明島嶼盡蓮花

遊補陀

上虞徐啓東主事

夢想名山久因之駕海來潮從天上湧利向嶼中開金
粟山爲鉢蓮花水作臺磐陀望三島咫尺是蓬萊

題補陀

鄞邑張邦岱

法界何從覓招提別有方羣峯依日小一水入雲長蹟
以蓮花著林將竹葉藏何時登彼岸側想在慈航

題補陀

鄞邑李先喜

憑虛聊騁望面面荻蘆秋坐據三生石心隨萬里流
鬪爭出沒日月自沉浮向夕煙氣斂珠光似可求

其二

法界元無著茫茫空水雲鐘聲潮外住佛相鏡中分
經爲魚龍說人將鶴鶴羣慈航如可借不厭往來勤

題補陀

鄞邑張邦侗署丞

海上神洲一刹奇珠宮紺殿五雲披雙林祇樹三千界
絕岸潮聲十二時月白滄溟鼉鼓振風迴大壑梵鐘遲
波濤浩渺諸天靜幾見滄龍覲法師

再遊補陀

新安程時望

爲憐淨土出天涯幾度相從泛遠槎
龍洞應窺會到客
法臺重雨舊時花無邊慧日懸祇樹
不盡慈雲接洛伽
更有寶光金色麗令人滌慮問三車

洛伽山

鄞邑
葉舜臣

驅石連鼇事有不蒼茫天地總輕漚
乘潮夜覺星河覆
破浪時驚日月流百谷龍蛇歸大壑
空王香火屬孤洲
邀僧施食龍歸鉢拄杖看雲蜃結樓
老蚌戲珠宵出浪
文鮑吹霧晝迷舟旁通異域應無數
咫尺神山若可游
坐想飛仙乘躡去行逢老衲借杯浮
如來若許親摩頂
願得誅茅最上頭

題補陀

鄞邑

董大晟

滄溟無際望中舒
寶月孤輪匝太虛
坐聽鼙鼓更通法
鼓從看龍女舞靈胥
磐陀石上三生偈
優鉢羅花四照餘
到此不知何彼岸
經聲天語自如如

潮音洞

新安

汪學信大學士

山根盤結水縈迴
大士當年說法臺
礁滑平波翻雪浪
巖懸白日起風雷
龍從洗鉢洋邊化
蓮就然檀定裏開
紫竹蒲林看不見
怪來僧向石中栽

贈遜吾上人

前人

曾將飛錫動天臺
一笠雲華自去來
欲證金仙親說法

白萃依舊蒲山開

題洛伽

歸安施敷同知

海嶠東南障九垓，凌空梵宇鏡中開。
經函萬卷黃金詔，地迴千重白玉臺。
疎磬清音超彼岸，禪林明月照如來。
莊嚴寶藏咸瞻仰，振古乾坤一壯哉。

海門望補陀

鎮海薛三才尚書

大界名山盡道場，獨看祇樹接扶桑。
轆轤萬劫留香火，龍象雙馴護法藏。
餅水逆添潮汐上，爐煙散入海雲蒼。
蛟門直望天門迴，幾度迷津問去航。

和家兄寄題補陀

鎮海薛三省尚書

三十一
三二
三三
磐陀咫尺幾時攀
恫恍天臨閭闔間
日濯琉璃明十界
水含宮殿動三山
蓮花隱現搖波白
竹葉叅差著石斑
莫道莊嚴消息遠
月明滄海聽潺湲

潮音洞

鎮海
陳王賓

層巒迴曲徑石竅瞰長虹
大士棲霞所龍神聽法宮
水梳瑤草滑風掃白雲空
悟入三摩地蕭然與味同

寄題補陀洛伽

鄞邑
李 垓

目極補陀勝名山大海東
歲時千里客來往一帆風波
湧金蓮界林依紫竹叢
何緣謝塵網膜拜與僧同

題補陀

鄞邑
屠大諒

曉日射珠林清光映遠岑寶旛雲外落石磬雨中沉琪
樹叅禪觀迦陵語梵音金容如可見灑灑遍甘霖

禮補陀

鄞邑

周應宸

一刹中懸積水間依然法寶護慈顏已聞地籟潮生浦
若墜天花春滿山佛以應權多著相僧因領衆不成關
爲儒未許皈依甚捨得齋錢亦自慳

遊靜室

前人

大觀知不極小築愜幽情石怪多題字僧深不識名依
山茅徑仄到處竹泉清祇是供隨喜新茶煮石鑪

登補陀山

鄞邑

屠大誼

一望蒼茫遠樹連羣山羅列寺門前紅蓮冉冉生香海
紫竹離離透梵筵天女散花叅聖諦應真渡筏叩玄詮
慈航一一資龍藏稽首金仙了俗緣

題補陀

薊邑 柴懋賢

大壑深林知幾重沉沉紺殿瑞煙濃衆香縹緲搏萃蓋
七寶莊嚴捧聖容風動繡旛看舞鳳雲生畫棟欲飛龍
徘徊忽上千峯月海印光寒起暮鐘

遊補陀

鎮海 邵鳳來 照磨

好將大海濯塵埃梵刹孤窗寥廓開翠岫薜蘿清色界
碧天水月淨樓臺夜光破暝旭初上晴雨飛空龍欲來

妬殺名山僧占盡閒敲鐘磬在雲隈

題洛伽

崇仁 吳學周 知縣

水雲千頃極蒼茫島嶼平吞日月光紫籀扶疎開竹色
紅衣掩映發蓮香欲參大士真空偈好泛如來般若航
見說九重頒象教恩波早晚遍遐荒

題補陀

華亭 黃正達 教諭

萬里蒼茫蜃色開琳宮寶殿鬱崔嵬夜寒風雨龍聽法
日落波濤僧渡杯大海總名功德水法身元是妙明臺
望中直接蓬萊境盡向楊枝洒處來

遊補陀

鎮海 邵輔忠 尙書

洛伽巖外水悠悠大士蓮臺自一洲佛火三摩傳不夜
鐘聲萬里徹清秋天澄虛白遙連壑山淨空青下滿樓
剩得禪心同澆蕩那知消息問泥牛

題十二景

存四

前人

幾樹疎梅倚石斜問梅開落屬誰家東風昨夜頻吹到
也作如來小白華

梅灣春曉

菩提那不是蓮花雷莢雲林長露芽山氣誰噓晴不散
半籠祇樹半籠茶

茶山風霧

削壁懸崖作海門波濤萬疊恍鯨吞上方諸品都空寂
水石聲聞亦不喧

古洞潮音

入定頭陀不下龕老松脩竹閉茅菴山童汲水烹山茗
只見煙飛併作嵐

靜室茶煙

遊補陀

鎮海

邵輔明

澤國煙霞駐聖靈六鼇駕出破滄溟山頭晴雪半涵白
水面寒波長送青雲擁祇林凝蜃氣香飄佛殿散龍腥
總知極樂西方界萬頃銀濤一淨餅

題洛伽

鎮海

劉堯賓

知縣

龍宮蛟室雪濤堆併是空王梵宇開淨色青山塵不著
寒光白夜日先來蓮洋人渡蓮爲楫雲水僧居雲作臺
到岸了無機事事沙鷗慣熟也忘猜

題洛伽

鎮海

周俊元

突兀千峯望不留
梵宮迴與白雲浮
靈鼇駕日光先到
古洞吞潮響暗流
夜半疎鐘清帶梵
天中空水碧澄秋
莫言苦海無涯際
彼岸分明在上頭

題補陀

鎮海

王世仁

正法宏慈遍九垓
道場遙向海中開
波光日色金銀界
松響濤聲晝夜雷
貝葉繙時禪幌靜
天花飛處慧香來
須知色相原無著
水上青蓮是法臺

題洛伽

鎮海

劉廷璿

妙覺真如啓法藏
祇園珠樹映扶桑
滄溟四望鋪晴練

燈火諸天燦夜光人到名山知佛國誰從苦海渡慈航
一聲鐘磬空雲水九品蓮開萬斛香

遊補陀

鄞邑金鏐

須彌山頂住諸天佛掌如何現大千海影盡含空外色
潮音不雜定中禪金沙灘上僧歸月紫竹林間鳥破煙
只辨直心皈大道無煩寶筏渡迷川

再守茲土重登補陀

台州劉炳文叅將

浪遊兩度謁山靈風景依然一望青古寺潮音聽落月
深林竹色隱疎星泥封彩絢丹紗鼎蜃氣香浮大士經
說法夜闌人未倦可知東海絕聞腥

遊補陀

漳浦

朱一鶚 知縣

西教至自龍象國東方隱此龕窟窟峯巒一點青螺浮
沙堤千步黃金築紫竹林開小白華秋風處處優曇誇
煙霞別是人間世水月孤懸大士家臺殿風高響鈴鐸
淵靜魚龍聽說法宮使傳經雲錦張山僧揮塵天花落
自慚身是宰官身回首空憐車馬塵爲仰慈靈參大士
一泛仙槎牛女津

題補陀

江陵

樊王家 知縣

寶刹靈空路轉深洪濤春雪見叢林波光倒影窺明鏡
晚籟含風響暗琴寂寂香雲成法界離離紫竹是禪心

名山應有神靈護龍氣長吹落日陰

遊補陀

鎮海

李一鳴指揮使

大道元無我浮生委此形容來秋結社僧過夜譚經虛
室月生白空庭雨送青憐余櫻世網寧不愧山靈

題補陀

勤邑

周應治憲副

一上天門望不窮諸天縹緲有無中團瓢寂歷懸危磴
伽室參差嵌碧櫳疊巘松濤清梵唄干霄籜影露真風
獨憐臺上磐陀石花雨紛飛散遠空

遊補陀八韻

宜興

何士晉都諫

琳宮絕壑駕靈鼉萬里煙光擁黛螺乾闥忽傳天樂細

迦陵時送鳥聲和御函別啓新蓮藏浩劫重開舊寶陀
水月觀中龍子出旃檀林內雁王過潮音作梵山齊吼
野衲栖巖雲蒲窩玉筍點斑留片石金沙足練護恒河
莫言島嶼津梁少翻覺風濤世路多兩度祝釐登彼岸
壬寅癸卯歲
余會再到願言千載不揚波

咏洛伽

鎮海

薛三台

舉人

孤插滄溟小白華煙濤千步湧金沙雪衣大士元常現
雲頂高僧別是家翠竹嫩滋山寺雨紅蓮艷奪海天霞
由來一葦堪航地莫道茫茫未有涯

朝陽巷

上虞

徐如翰

憲副

樹密徑幽深禪房春晝陰斷雲寒宿檻流水靜穿林僧
說前朝事人多象外心翻悲出門去鐘磬有餘音

雨中尋普陀諸勝

前人

緣巖度壑各擔簦翠合奇環賞不勝竹內鳴泉傳梵語
松間剩海露金繩山當曲處皆藏寺路欲窮時又遇僧
更笑呼童扶兩腋迥風直上最高層

遊白華贈朗徹禪師

前人

幾轉層楹倚翠微目規心構出天機碧垣曲曲藏幽徑
紫竹陰陰護短扉林罅海光遙入座窻前花影故侵衣
懸知一覺禪床夢又聽潮聲去復歸

別朗公後阻風蓮花洋却寄

前人

欲擬君爲詩慧休休公未必解禪修生成鶴骨癯而秀
構得蝸廬巧更出松塵玉霏寒草座石床花雨泛茶甌
轉憐十載睽違事故仗天風滯去舟

潮音洞

前人

羣公共禮潮音洞莫作潮音洞口詩縱有繡腸描不出
直須絕倒叫神奇

望海十二韻

前人

目力有時極水光何處窮但知川谷往誰識尾閭終曉
氣惟占旭濤聲不借風舟行無里道帆挂任西東忽過

夷王島還浮龍女宮亂雲疑列嶼孤鳥指驚蓬世界空
明盡神州杳靄同長看明鏡迴倏爾怒霆雄琛怪紛難
紀昏朝望轉蒙量包乾與外脈入地維中河伯宜長嘆
天潢自有宗聖朝波不溢佛國路常通

育恩院山石奇勝當爲普陀諸靜室之剋漫成十

二韻

前人

山勝皆藏石石奇各肖形地當幽絕處寺露半開局小
檻援飛霧閒窻瞰落星曲階苔細細危竇水冷冷竹罇
斜通白雲標別染青密陰時護徑麗影欲充庭挹海懸
雙鏡開山問五丁漸疑霞作屋翻訝蘚爲屏坐卧俱成

適攀躋覺有靈稗僧能咒鉢仙子解談經時有一小沙彌能持施食

咒而定海揚利軍以扶鸞高名呂祖談佛法頗妙面壁宜深定鑄題各辨銘石

刻泐甚衆故云最憐齋報午粳粒笋芽馨

贈白華菴昱光禪師

秣陵

張可大

叅將

不識青蓮界山花白幾叢松關窺澹月竹逕逗微風人語龍天外僧歸蜃市中支公譚小品跌坐意何窮

題普陀

前人

海雲面面護禪宮屹立中流砥柱雄巨石有靈疑說法洪鐘無碍只隨風寒潮作梵連松韻明月和香透竹叢白鶴下來秋色靜支公玄度此心同

其二

精廬彷彿類天宮紫竹青蓮屨市中客以乘槎遊汗漫
僧從卓錫住虛空盤雲怪石疑將墜噴雪潮音只自雄
水月任教觀自在松窓半偈釋塵籠

其三

萬里濤聲繞翠微松門蘿幌到人稀
龍象經行佛日輝紫竹已同羣木秀白鷗猶帶晚潮飛
梅山倘寄長生藥欲向滄浪問息機

贈無邊禪師

鎮南
王元翰 給諫

卓錫名山截愛河結菴猶自傍磐陀
遠公捷徑開蓮社

陶令靈心中酒魔紫竹林中原有相白洋海上近無波
爐煙茗椀盤桓處領畧無生法已多

大汎閱師海上還登洛伽有作慈谿 袁兆錦參將

天險東南此一山重將龍象獲雄關自懸慧日臨千島
不盡恩波到百巒暫偃牙旗看奕罷偶過竹院聽鐘還
細思銅柱題名客何似輕鷗翠靄間

補陀十二詠存三 鄞邑 陳朝輔侍御

誰將磐石柱晴空仙界虛明一線通初日未離滄海底
翠微千丈已先紅峇陀曉日

慧日澄圓覺海中白蓮香滿獻花風何人不道天香杳

已自樓船面面通

連洋午渡

幽壑沉沉春色回
虛堂陰雨長莓苔
新煙數縷穿雲竇
石鼎茶香客遠來

靜室茶煙

寓普陀次沈彤菴韻

武進

吳鍾巒

尚書

懷闕亭虛已劫灰
御書猶向海天開
長明佛日古今在
如是潮音子午來
大士化身無住地
子真遺世尙留臺
太平香火當年盛
離亂禪栖半草萊

其二

萬壑松濤入夜寒
泠泠非復世情看
隨緣竹裏逢開士
說法詩中現宰官
歸潔幸於塵界遠
逃虛敢謂考槃寬

維摩丈室堪休歇不願遊仙駕彩鸞

其三

蕭條無事小年過隨意經行聽法螺山靜地偏人境隔
林深僧少鹿場多雲封古洞飛仙蝠潮落平沙見石鼉
對境寂然忘故我一時脫卻舊來窠

寓無凡靜室彤菴携酒見過

前人

八年於外未歸人此日興懷倍苦辛君國莫支成舊恨
僧寮偶寄是前因深深林壑同踪少遠遠罇罍入眼新
不比尋常往來事只今同患覺情親

寓白菴菴生辰

前人

蓬萊縹緲幾人探欲問長生有貝函最上大根堪付法
是中深趣且抽簪巢由遁世山之北管葛匡時斗以南
海外餘年殊自愧可容永日伴優曇

重修南海普陀卷之十七終